

Na osnovu člana 50. stav (1) alineja y) Statuta JU Univerziteta u Tuzli, a u vezi sa članom 21a Zakona o zaštiti ličnih podataka Bosne i Hercegovine („Službeni glasnik BiH“, broj: 49/06, 76/11 i 89/11), Upravni odbor Univerziteta na sjednici održanoj 21.01.2020. godine, donio je

## **PRAVILNIK**

### **o korištenju video nadzora u objektima Univerziteta u Tuzli**

#### **1. Opšte odredbe**

##### **Član 1.**

Ovim Pravilnikom regulišu se svrha, način postavljanja i korištenja tehničkih pomagala za video nadzor objekata Univerziteta u Tuzli (dalje: Univerzitet), te način obrade ličnih podataka putem video nadzora.

#### **2. Svrha uspostavljanja video nadzora**

##### **Član 2.**

(1) Svrha uspostavljanja sistema video nadzora u objektima Univerziteta (Rektorat, fakulteti/Akademija i Studentski centar) je neophodna optimizacija zaštite i sigurnosti studenata, uposlenika i trećih osoba koje se nađu u prostorijama Univerziteta.

(2) Sistem video nadzora se koristi i za sigurnost objekata i zaštite imovine Univerziteta, a naročito u periodu kada se ne izvodi nastavni proces, u noćnim satima, u dane vikenda i drugim neradnim danima, u dane praznika, te u periodu kolektivnog godišnjeg odmora.

#### **3. Način postavljanja video kamera**

##### **Član 3.**

(1) Za nadzor objekata Univerziteta, u svrhu iz člana 2. ovog Pravilnika obrađivači su ovlašteni koristiti tehničke uređaje za video nadzor, te primjenjivati druga tehnička pomagala za snimanje i digitalnu obradu događaja, u i oko objekata Univerziteta.

(2) Tehnički uređaji za video nadzor se postavljaju na vidno mjesto.

(3) Video nadzor se postavlja na adekvatno mjesto, na temelju organizacijskih i sigurnosnih potreba, te tehničkih mogućnosti. Video nadzorom se mogu obuhvatiti glavni ulaz u objekat, ulazni hol, te prostor oko objekata, bez zahvatanja u okolni javni prostor.

(4) Mjesta za postavljanje video nadzora definisana su šemom kamera, koja se ažurira u skladu sa potrebama.

##### **Član 4.**

Zaposlenici Univerziteta, studenti kao i treća lica koja dolaze u prostorije Univerziteta se obavještavaju da su objekti pod video nadzorom, na način da se obavještenje – naljepnica, adekvatne veličine koja sadrži sliku kamere i jasno vidljiv natpis "Objekat je pod video nadzorom" postavlja na glavnim ulaznim vratima u objekte Univerziteta u kojima je instaliran video nadzor.

##### **Član 5.**

(1) Snimci nastali korištenjem aplikacije za video nadzor pohranjuju se na snimaču, a isti se obrađuju i koriste u skladu sa Zakonom o zaštiti ličnih podataka BiH, na način kojim se osigurava poštovanje prava na zaštitu privatnosti i ličnog života nositelja podataka.

(2) Nastali snimci se mogu kopirati ili drugačije elektronski obrađivati samo u svrhu dokazivanja oštećenja ili krađe imovine, odnosno počinjenja krivičnog djela u objektima Univerziteta i u prostoru oko objekata, te u svrhu sprječavanja ugrožavanja zdravlja i sigurnosti uposlenika Univerziteta i studenata.

#### 4. Način obrade ličnih podataka

##### Član 6.

Obrada ličnih podataka putem video nadzora vrši se u obliku video zapisa koji sadrži sliku, datum i vrijeme.

##### Član 7.

(1) Kontrolu, način i vrstu korištenja podataka koji se prikupljaju video nadzorom vrše zaposlenici Univerziteta, koje posebnim rješenjem odredi Rektor Univerziteta.

(2) Video zapis se čuva 30 dana od dana nastanka, nakon čega se briše.

(3) Pristup video zapisu može se omogućiti zaposlenicima i nadležnim institucijama u TK u slučaju incidentnih situacija, koji odobrava Rektor Univerziteta, uz prethodno podneseni pismeni zahtjev.

##### Član 8.

Video zapis se može dati na uvid zaposleniku ili nadležnim institucijama u TK, pod uslovom da su ispunjeni slijedeći uslovi:

- a) Da se desila incidentna situacija vezana za ugrožavanje sigurnosti imovine ili zdravlja lica iz člana 2. stav (1) Pravilnika,
- b) Da je podnesen pismeni zahtjev za omogućavanje pristupa video zapisima sa jasno određenim vremenskim razdobljem za koji se traži pristup video zapisima,
- c) Da u arhivi snimljenog materijala postoji video snimak u traženom vremenskom razdoblju.

##### Član 9.

(1) Rektor Univerziteta, kao ni bilo koja druga osoba, ne smije koristiti podatke o osobama, prikupljene sistemom video nadzora izvan njihove zakonske namjene, te namjene utvrđene ovim Pravilnikom.

(2) Raspolaganje snimcima dopušteno je samo Rektor i zaposlenicima pismeno ovlaštenim od strane Rektora.

#### 5. Završne odredbe

##### Član 10.

Ovaj Pravilnik stupa na snagu danom donošenja i bit će objavljen na web stranici Univerziteta u Tuzli.

UNIVERZITET U TUZLI

PREDSJEDNIK UPRAVNOG ODBORA

Broj: 04-295-1-4/20

U Tuzli, 21.01.2020.godine

Amir Sabačić, dipl.ing.

